

# Peduru tapara papeu humo Sesus tuktsa bo ziwatahaka nanabyitaba napykyryknaha

Peduru Sesus tuk zinymyrykta. Sesus tuktsa bo ziwatahaka nisiakusukniki. Sispirikpobyitsa nisisapybyrikinaha iwatahi sibo ziwatahaka. Deus Peduru ziapewywyky iwatahi Deus harere ziwatahaka. Aba katsa kino niwatihi Sesus soho humo tanymyryky.

---

**1** <sup>1</sup>Utakta Peduru. Kiristu Sesus iakzohota. Sesus Kiristu kape niy: — Ikia myzubaha bo tsimy. Nanabyitaba wasania ty tytsaso — niy.

Yhỹ iky.

Aba ikiahatsa Deus tyryktsa bo piwatahaka. Zahawatawy. Nanabyitaba tsinapykyryknaha. Põto eze tsinapykyryknaha. Karatas eze, Kapazosia eze, Asia eze, Bitinija eze iwa tsinapykyryknaha. Sihudikhudikwy ezektsa ahasoho — O bipyritsa — mykaranaha. Deus batu — Asahi katyryktsa — my. <sup>2</sup>Deus myzo koikny bakta tu niy:

— O asaktsa mysiwatawy. Amy skaraba niwa nikara, asaktsa mekywa tu moziknaha simysapyrẽtsa moziknaha iwatahi mysiwatawy. Sesus Kiristu harere bo yhỹ mynakaranaha iwaze simysapyrẽtsa moziknaha. Sesus katse babata sisapy zeky nihyrikosokda iwatahi kahyrikoso situk mynapykyryk — niy. Aba Deus bo ahasoho motsasoko:

— O myzo atyryktsa humo tysipokzitsikikta. Asaktsa nanabyitaba mynapykyryknaha tysisakihikykta. Ahumo sakurẽtsa babatsa moziknaha — my. Iwa Deus bo mopamykysoko.

**Deus sapyrẽnikiha ty ana humo hi tsinamyspihikiknaha.**

<sup>3</sup>Katsaktsa Deus tsimytsasokonahaktsa:

— O Deus myzo ikia zuba tsamysapyrẽta. Ikia Sesus Kiristuzo tsimy wasani tsimykara — tsimaha. Atahi Sesus Kiristu nihyrikosokdaze

izihyryzikpowy. Iwatsahi katsa ihumo tsimyspirikponaha zeka Deus tyryktsa tsimoziknaha. Deus myhumo tsimypokzitsiarêta iwaze ihyrytsa tsimoziknaha.

<sup>4</sup>Iwatsahi tsipiperykynaha. Deus tuk mywahi tsimynapykyryknaha iwatsahi taperyky. Deus bijoikpe eze tu isapyrênikiaha ty kino mybo nyny my. Deus mybo nyny mahaka ba zikyryry batu hawa tohi ziky ba zikokda. Deus isapyrênikiaha ty tawahi mynakara anatyhi Deus mybo nyny my. <sup>5</sup>Deus isapyrênikia ty tabaze botu zikymy. Sesus Kiristu humo tsimyspirikponaha zeka Deus tawahi ahahumo tsimypokzitsiukrêta. Aibani hawa ibo mymyoktyhyryk ana hi myzubaha bo piwatawy. Ituk mywahi tsimynapykyryknaha ana hi taperyky.

<sup>6</sup>Ana soho bo hi mytsaty tynakaranahaktsa kytsa! Ana humo hi ahakurêtsa. Mybarawy eze tuze tsimyzurukunaha batu ahaku. Sinini tsimykaranaha humo ahasukatsihikrêtsa. Ahamyitsapyri humo batu ahaku. Pahamyijaikiknaha humo batu ahaku.

<sup>7</sup>Ouro wa tsipokzitsarêna katsaktsa ouro wa. Katsa kino Sesus humo mspirikporêtsa zeka ihumo mymypokzitsirêtsa hÿ. Katsaktsa ouro izo bo piakzazanaha wa takpyky amybara tu ja iwaze amy ty ouro baba zuba motare, iwa Deus niwatihi mybo my. Sinini tsimykaranaha zeka Sesus humo mspirikporêtsa ana humo hi tsihyrinymyrêta. Sinini tsimykaranaha zeka Deus harere bo yhÿ tsimykaranaha. Myspirikporêtsa hÿ wasani tsimykaranaha. Ba zikpyk ana humo hi Deus tsihyrinymyrêta. Ouro izo eze ky waha. Sesus Kiristu myziksizoze Deus ahape:

— Kaokzeka ikiahatsa ahamysapyrêtsa. Ahaharere wasani Sesus watsa ahapunihikrêtsa tsimoziknaha — my.

<sup>8</sup>Katsa Sesus Kiristu bo batu iktsa zikaha iwatsa tu ihumo mymypokzitsirêtsa. Aba ihumo ba zinyaha iwazehi ihumo ahaspirikporêtsa hÿ. Ahaspirikporêtsa zeka ahakurêtsa tsimoziknaha. Sesus Kiristu humo ahakurêtsa hÿ. <sup>9</sup>Ikiahatsa Sesus humo tsikspirikpokonaha. Iwatahi Deus bo pahaoktyhyryk. Aba ahakurêtsa Deus baze tu tsinapykyryknaha iwatsahi ahakurêtsa hÿ. Abaka ikiahatsa ituk tsimynapykyryknaha. Tawahi ahahumo abaka ba zikmyrek tsahahyrynymyrêtsa hÿ.

<sup>10</sup>Tubabatu Deus sohokotsa mytsaty nikaranaha. Hawa Deus mybarawy ezektsa mysipokzitsiki ana soho bo mytsaty nikaranaha. Anahi zinymyry tsihikiknaha. Asaktsa:

— Hawa Deus hyrytsa humo mysioktyhyryk. Hawa ihyrytsa humo tsimypokzitsiukrêta — nikaranaha. Iwa ziknapamykysokonaha. Tapara Deus mybarawy ezektsa mysioktyhyryk iwa Deus sohokotsa ziknapamykysokonaha. <sup>11</sup>Kiristu hyrikoso Deus sohokotsa tuk niapykyryk. Ata soho sibo nitsasokoro. Ata soho:

— Deus zipehata sinini mykara. Sininiwy nepykze Deus isoho “O katse humo kakurêta” — my kytsa isoho humo niwatihi — O atakta

imysapyrēnikita. Wasani mykara — maha. Anasoho ziwabynahaze Deus sohokotsa hi:

— Aty skaraba Kiristu hyrikoso mybo hi motsasokoro — nikaranaha.

<sup>12</sup>Deus sohokotsa ispe niy:

— Batu ikiahatsa bo zuba katse sinini mykara. Aiba ezektsa kino niwatihi sinini mykara — niy.

Taparaktsa Deus sohokotsa ana harere ziknatsasokonaha. Abaka kytsa Deus wasania ty ahabo motsasokonaha atsatu ahabo motsasokonaha. Deus hyrikoso harere humo motsasoikiknaha. Ata kino Deus bijoikpe ikny inasikta ata soho motsasokonaha. Bijoikpe iknyktsa Deus tsumuēhītsitsa kino niwatihi inasikta harere pinymyry tshihikiknaha.

### **Deus imysapyrēnikita. Iwatsahi ahamysapyrētsa niwatihiiktsa.**

<sup>13</sup>Kyze iwatsahi meky watu tsimoziknahaktsa! Sesus Kiristu myziksizoze Deus tisapyrēna ty ahabo nyny my ihumo myspihikrētsa. Ahanamy bo ka mytsaty mytsaty byitaha. Sesus Kiristu myziksizo naha bo zuba mytsaty tynakaranaha! <sup>14</sup>Tapara ahaspirikpobyize ahasopyksapybyitsa ziknakaranaha. Abaka mahani. Deus harere bo hyÿ tsimykaranaha ana humo hi tsinymyrykynaha. Amy ty wasani tsimynakaranahaktsa! <sup>15</sup>Deus imysapyrēnikita. Ata kino ba zimyí. Atahi zahawatawyhik. Iwatsahi ikiahatsa iwata tyzurunahaktsa! Ahaharere wabymybara byihuja ahaharere humo kino wasani tynakaranahaktsa! <sup>16</sup>Deus papeu humo botu ziwatahaka:

— Utakta ba zimyí. Kamysapyrēta. Iwatsahi ikiahatsa kawatu tykaranahaktsa. Kawatsa tihi ba zimyinahaktsa — niy.

<sup>17</sup>Iwaze Deus bo tsimypamykysokonahaze ipe tsimaha:

— O Deus myzo — tsimaha.

Atakta myzubatsa astsatutsa watsa isopyk. Hawa mykaranaha ty motsaso. Asahi wasani mykaranaha zeka isapyrēnikia ty sibo nyny my. Asahi sisopyksapybyitsa mykaranaha zeka sinini ykarawy bo mysipehahik. Hawa mykaranaha zuba humo motsasoko. Iwatsahi hawa tsimyzurukunaha zeka pykyhytutaha tsimaha.

<sup>18</sup>Tapara zikzurukunahaze isapybara ty tsikykaranaha. Ahazotsa watsa zikzurukunaha, sisopyk yhyÿ tsikykaranaha iwatsahi ahasopyksapybyitsa tsikykaranaha. Deus zikwy humo meky watu tsimoziknaha. Ihumo ahamysapyrētsa tsimoziknaha. Hawa sa niy Sesus Kiristu ahasapyzeyky zibezenaha. Ahasapyzeyky nihyrikosokda iwaze Deus bo myoktyktsa niyzik. Atahi Deus ouro ty batu nyny niy. Parata ty kino niwatihi batu nyny niy. Ouro aiba eze mohokda. Iwaze parata niwatihi mohokda. Batu pykyhy ipokzitsi.

<sup>19</sup>Deus Sesus hyrikosokdawy huak tsipokzitsarēna hiba. Kiristu nihyrikosokdaze ahasapy ziaксе. Taspu ahapokzi ziweke. Taparaktsa

hozipyrykzatsa wa kytsa sapyzeken ziknasibakanaha. Iwatahi sisopyksapybyitsa nikaranaha Deus nisiokzohik hozipyrykzatsa ziknasiwezokonaha anahumo hi nisiokzohik. Hozipyrykzatsa sisapyrētsa zuba nisibakanaha. Hozipyrykzatsa simyitsapyrētsa zeka ba ziksibanaha. Atawata hi Kiristu ahasapyzeken nihyrikosokda. Imysapyrēnikita tu ahapokzi nihyrikosokda hozipyrykza wata niy.

<sup>20</sup>Tapara Deus mybarawy isuknihibyize Sesus mymyoktyhyrykta ziwatawyhik. Iwatatu abazubata Deus tatse zipedahik. Mybarawy ezektsa bo inasik iwaze Deus bo pahaoktyhyryk. Aibaze myzubaha ihumo mospirikponaha. <sup>21</sup>Kyze Sesus nihyrikosokdaze Deus zihyryzikpowy. Myzubaha ibo iktsa maha. Atahi imysapyrēnikita wasani mykara. Iwatsahi taperyky. Ikiahatsa Deus humo ahaspirikporētsa iwahi Deus mozihikik.

<sup>22</sup>Abaka Deus harere bo yhȳ tsimykarannahaze, Deus hi:

— O asaktsa wasani mykarannaha. Mekywatu niyziknaha — niy. Ahatukytsa humo ahamypokzitsiukrētsa h̄y. Ba zikahape spihikbatanaha ahatuktsa humo ahamypokzitsiukuk. <sup>23</sup>Ahazotsa ikny tsipupurukuknaha. Ahazotsa mybarawy ezektsa niakbabanaha. Ikiahatsa kino niwatihi tsimyhyrikosokdanaha. Abaka ikiahatsa tsimypurukzonaha hyrity watsa, Deus hyrytsa tsimoziknaha. Deus ba zikyrikosokda. Katsaktsa Deus harere bo yhȳ tsimykarannaha zeka Deus hyrytsa tsimoziknaha. Deus harere ba zikpyk, tawahi mypyk. Ikiahatsa hi tsimypurukzonahatsa hyrity watsa ihyrytsa tsimoziknaha. <sup>24</sup>Deus papeu humo

— Mybarawy ezektsa wihara sazik waha.

Abaka wihara sazik anatu byi hana bo nasaziktōbaik.

Wihara sazik hana bo ja atsoko nihokda

<sup>25</sup>Deus harere ba zikpyk.

Tawahi iharere mynapykyryk — niy.

Ana kino botu tsiwabynaha. Deus wasania ty tsiwabynahaze iharere bo yhȳ tsimykarannaha.

**Sesus harahare tsipokzitsiarēta hyrity wata.**

**Sesus tuktsa Deus tyryktsa maha.**

**2** <sup>1</sup>Kyze amy ty sisopyksapybyitsa batu h̄y zikaha ahamyspihikbata byrihuja. Wasape tsimykarannaha! Mektsa humo ahazokdi byrihuja! Ahasopyksapy byihuja! Ahaharerewabymybara byihuja! Iwa tsimykarannaha. Tapara ahaspirikpobyitsa tu tsikykarannaha. Abaka batu. Mekywatu tsimoziknaha.

<sup>2</sup>Mypehatsa ahahumo tsimypokzitsiukrēta. Iharere papeu humo ziwatahaka ana kino tsipinymyrykynaha! Ibykyhy ipurukuhu zytyk tawa

taje tsotsik iakparawy. Ikiyahatsa kyry watsa Deus harere ahakparawy. Iharere anawaha. Ibykyhy wotsik humo taypykyk anawa hi Deus harere humo meky watu tsimoziknaha. Ahamysapyrëtsa tsimoziknaha. <sup>3</sup>Iwaze Sesus humo ahaspirikporëtsa atahi Deus pahaoktyhyryk, atahi ihumo pahapokzitsiki.

<sup>4</sup>Mypehakatsa Sesus humo ahaspirikporëtsa. Atahi harahare ispitu zek tawata. Sesus zuba ispitu mynapykyryk. Wastuhu kytsa ihumo batu siakparawy. Sispirikpobyitsa hi ihumo batu siakparawy. Isoho:

— Atakta batu imysapy — sisopyk. Deus hi isoho:

— Atakta imysapyrënikita. Zikpehata ba zikmyi. Mybarawy ezeiksa kabo mynasioktyhyryk — niy.

<sup>5</sup>Ikiyahatsa Sesus humo tsimyspirikponaha zeka atahi ahahumo tsimypokzitsiukrëta. Ikiyahatsa haraharezatatsa hyrity watsa tsimoziknaha. Deus wahoro zubata haraharezatatsa ty hi nizukniki. Asahi ihumo sispirikporëtsa iwahoro zubata hyrity watsa maha. Deus hyrikoso situk mynapykyryk iwatsahi iwahoro hyrity watsa maha. Abaka ikiahatsa hi Deus wahoro zubata eze ziknapamykysokonahatsa watsa tsimaha. Mekywatu tsimoziknaha. Deus hyrikoso ahatuk mynapykyryk humo ahamysapyrëtsa tsimoziknaha. Tubabatu Deus wahoro zubata eze ziknapamykysokonahatsa Deus zitsumuëhikīnaha. Siwatsa ikiahatsa ziknapamykysokonahatsa watsa ikiahatsa Deus tsitsumuëhikīnaha. Nawa haty Deus bo nyny niaha ana humo hi tsakurëta nikara. Atsatu nawa ha Deus bo nyny tsimaha ana humo hi tsakurëta mykara. Sesus humo ahaspirikporëtsaze Deus ahahumo tsakurëta mykara. <sup>6</sup>Deus papeu humo ziwatahaka:

— Kytsa wahoro mozoknikinahaze haraharetsa mysiwatawykynaha. Utakta harahare hyrity wata.

Harahare tisapyrëta.

Harahare ustsaharaharezatatsa iwa babatsa tu buruhuwa nisizozokonaha.

Atahi harahare hyrity wata myzipeha.

Siaõ sapy waha bo myzipeha.

Atahi myzubaha ibo iktsa zuba maha.

Wasani mykara.

Aty ihumo tispirikporëta atahi batu isikpyby.

Atahi tsakurëta hÿ

Iwa Deus papeu humo niy.

<sup>7</sup>Ikiyahatsa Sesus humo ahaspirikporëtsa ahabo harahare hyrity wata my. Harahare tisapyrëta. Ihumo sispirikpobyitsa Sesus batu siakparawy, atahi sibo harahare isapybyita hyritywa my. Deus harere papeu humo ziwatahaka:

— Wahoro suknikitsa ata harahare humo batu hÿ zikaha.

Ata harahare hi tisapyrēta niyzik.

Ata humo hi ustsā haraharezatatsa iwa babatsa buruhuwa  
nisizozokonaha — niy.

<sup>8</sup>Usa Deus papeu humo ziwatahakazo:

— Ata harahare humo hi kytsa mynaranaha.

Kytsa Deus harere humo batu h̄y zikaha  
sisopyksapybyitsa nikaranaha.

Iwatsahi harahare hyrity wata nisimiwy — niy.

Ata hyrity wata Kiristu kytsa abazubatsa pehakatsa mozik. Asahi  
iharere bo batu h̄y zikaha natukyrikihyk nahatsa watsa. Hawa Deus  
nizihikik batu h̄y niaha.

<sup>9</sup>Ikiahatsa hi meky watu tsimoziknaha. Deus zahawatawy. Tubabatu  
ityryktsa Sudeutsa nisitsihikik. Iwatahi zahawatahawy. Ikiahatsa  
Deus wahoro zubata eze ziknapamykysokonahatsa hyrity watsa Deus  
tsitsumuēh̄ikīnaha. Mekywatu tsimoziknaha. Deus hyrytsa tsimoziknaha.  
Deus zahawatawy iwatsahi ipe tsimaha:

— O Deus myzo ikia zuba wasani tsimykara. Ikia zuba tsamysapyrēta.  
Ikia myhyrizikwanikita — tsimaha. Iwa ahamysopyksapybyitsa  
tsikykaranaha iwaze tsmoewyhiknaha ana ty hi tsiipiawawykynaha.

Tapara ikiahatsa kytsa miwa Ezektsa watsa tsimaha. Abaka kytsa  
iwororoha buruktsa watsa tsimaha ahamysopyksapybyitsa tsikykaranaha  
tsimoewyhiknaha. <sup>10</sup>Tapara ikiahatsa Deus hyrytsa byitsa tu. Abaka  
ihyrytsa babatsa tsikyzyknaha. Tapara ahanamybyitsa watsa abaka batu.  
Abaka Deus ahahumo tsimpokzitsiukrēta.

### **Katsa Deus tuk tsimyzihikiknaha.**

<sup>11</sup>Kyze — O katukytsa ikiahatsa mybarawy eze sisukmotsa watsa  
tsimaha. Bipyritsa watsa. Mybarawy eze tsinapykyrykspyknaha. Ikiahatsa  
ahabo zuba mytsaty tsimykaranaha zeka ahamysopyksapybyitsa  
tsimykaranaha. Ikiahatsa tsimyikinaha. Ahamysapybyitsa tsimykaranaha  
ana hi tsmoewynaha — my. <sup>12</sup>Kytsa Sesus humo sispirikpobyritysa  
zimyiyaikiknaha. Sesus tuktsa soho motsaso tsihikiknaha:

— Myokzeka batu wasani mykaranaha. Kytsa nisibaikiknahatsa watsa —  
mybarapetu mykaranaha. Ikiahatsa siokzeka batu zimynaha. Ahahyryzikporētsa  
wasani tsimahaktsa! Ahamysapyrētsa tsimaha iwaze ahasoho motsasokonaha:

— O asahi wasani mykaranaha — maha. Siharereziubyitsa ahasopyk  
wasaniha humo harereziu mykaranaha. Nawa puruze Sesus myziksizoze  
ahasoho tihi:

— O asaktsa simysapyrētsa — mykaranaha.

<sup>13</sup>Kyze ikiahatsa Sesus tuktsa tsimaha. Mypehakatsa Sesus hyrytsa  
tsimaha. Mypehakatsa harere bo yh̄y tahaktsa! Iwa tsimyzurukunaha  
zeka Sesus soho ty ka batu tyso:

— O atakta batu imysapy — maha. Iwa ba ziktsasonaha. Mypehakatsa abazubatsa Sesa harere bo yh̄y tsimykaranaha. Mypehakatsitsa ustsahudikhudikwy ezektsha iharere bo yh̄y mykaranaha. <sup>14</sup>Ahapehakatsa harere bo yh̄y tsimykaranaha. Deus harere humo Sesa zahapeha. Kytsa simysopyksapybyitsa nikaranaha ipokso sipybyr̄etsa. Kytsa hi simysapyr̄etsa sisoho:

— Myokzeka wasani tsawatsa tsimaha — mykaranaha. <sup>15</sup>Asaktsa Sesus humo sispirikpobyitsa ahasoho pahaziubyri tsihikiknaha. Ikiatsa hi tsipisapybanaha zeka batu zikaha. <sup>16</sup>Zihitsa tsumuēh̄itsa pe:

— Tsimyzukehik — niy. Kyze ikia tsipiksi iwa hana wa tihi mykaranaha. Hana bo ja tahasapy tsihikiknaha nabo mokurunaha. Katsa Sesus humo tsimyspirikponaha zeka siwatsa mymyzihikr̄etsa. Myharere zuba zeka tyso so byitaha iwa zeka batu imysapy tsimykaranaha. Iwa tihi:

— Aba mymyzihikr̄etsa iwaze tsipipokzitsikinaha. Deus harere bo zuba yh̄y tsimykaranaha — tsimaha. <sup>17</sup>Myzubaha bo wasani tsimykaranaha! Ustsahudikhudikwy ezektsha ahatukytsa humo ahamypokzitsiukr̄etsaktsa! Deus harere bo pykyhytuty yh̄y tsimykaranaha. Mypehakatsa abazubata harere bo yh̄y tsimykaranaha. Takino ustsahudikhudikwy ezektsha siharere bo yh̄y mykaranaha. Iwaze sizubar̄etsa bo wasani tsimykaranaha.

### **Kiristu sininiwyky atawata tsimyzurukunahaktsa.**

<sup>18</sup>Kyze O Sesus tuktsa ahatsihitsa harere bo yh̄y tsimykaranaha. Ahatsihitsa ahabo wasani mykaranaha zeka siharere bo yh̄y tsimykaranaha. Ahatsihitsa ahabo wasani ahabyizeka niwatihi siharere bo yh̄y tsimykaranaha. Ahatsihitsa simysapyr̄etsa harere bo yh̄y tsimykaranaha. Sisakimiyjanikita zeka kino niwatihi siharere bo yh̄y tsimykaranaha.

<sup>19</sup>Ustsahudikhudikwy ezektsha kytsha pahasapybyikinaha zeka Deus harere bo yh̄y tsimykaranaha humo sinini tsimykaranahaze. Iwa Deus myzehikik ahahyrinymyr̄etsa. Ikiatsa sinini tsimykaranaha zeka ahakubyrisoroku ja iwaze Deus tisapyr̄ena ty ahabo nyny my.

<sup>20</sup>Ahatsihitsa pahabetsakaknaha ahamysapybyitsa tsimykaranaha humo Deus tisapyr̄ena ty ahabo batu nyny ziky. Ahazikaranikitsa zeka pahasininiwyky iwaze Deus isapyr̄enikia ty batu ahabo nyny ziky. Ikiatsa kino tsipisapybakanaha zeka ahatsihitsa pahasininiwykynaha tu iwaze Deus tisapyr̄ena ty ahabo nyny my. Ahapunihikr̄etsa tsimoziknaha. <sup>21</sup>Ana humo kino Deus zahawatawyhik sinini tsimaha Kiristu wata zahawatawy.

Kiristu ahasapyzky sinini nikara iwatsahi ikiahatsa sinini ykarawy bo ahawahi ba zikahasapynaha. Atahi imysapyr̄enikita tuze sinini nikara.

Iwata tsimyzurukunahaktsa ana bo kino Deus zahawatawyhik. <sup>22</sup>Kiristu ba zimyi. Ba zikmyspihikbata. <sup>23</sup>Utsa ihumo siharewewabymybarêtsa atakta sibo batu harere. Kytsa zimyijakanahaze batu taty tsapusare niy. Tasukyritsitsa ty batu tyso:

— Ikiahatsa tsipiksapybyrikinaha iwatahi sinini tsimaha iwa mozihihikik — my. Iwa batu tyso. Atahi:

— O Deus ikia kahumo tsipikpokzitsiki kahyrinymyrêta. Ikia hi wasani tsimykara. Kasukyritsitsa bo wasani tsimykara — niy. Iwa Deus bo nitsaso.

<sup>24</sup>Mysopyksapybara humo Kiristu nihyrikosokda. Iharapatawyhyta humo nihyrikosokdaze mysopyksapybyitsa tsimykaranaha mysapyzeka nihyrikosokda, iwaze mysopyksapybyitsa tsikykaranaha Deus nimyokzohik. Nihyrikosokda iwatsahi mypunihikrêtsa tsikyziknaha. Batu mypyby. Mekywatu tsimoziknaha. Deus okzeka mysapyrêtsa. Kiristu tetekwy humo tsikzororona. <sup>25</sup>Tsikykmynaha. Katsakta hozipyrykzatsa hyrity watsa asahi ske byita buruk nizaranaha. Abaka Deus mymyoktyhyryk. Ituk tsinapykyryknaha. Atahi myhumo tsimypokzitsiukrêta. Iwaze myzarabyitsa wa tsimoziknaha.

### Hawa sisukzakatsa sisopyk.

**3** <sup>1</sup>Kyze nawa sipytakaza! Ahapytsa harere bo yh̄ tykaranaha. Wastuhu ahapytsa Deus harere bo yh̄ ahabyizeka ikiahaka zuba iharere bo hȳ tsimykaranaha. Ikiahaka wasani tsimykaranaha zeka ahapytsa Deus harere bo hȳ mykaranaha. Ikiahaka ityso byizeka Deus harere bo hȳ mykaranaha. <sup>2</sup>Ikiahaka wasani tsimyzurukunahaze ahapytsa tahapehe mykaranaha:

— Kaoke tatsa tsimysapyrêtatsa. Atatsa iktsa zuba isopyk — mykara. Iwatahi Sesus Kiristu humo tispirikporêta mozik.

<sup>3</sup>Kykyryk pykyhytutaha! Ahasuk ty wasania tyzuba korokbyktaha! Ahasuk wasanita ty korobyk tsimaha zeka kytsa ahabo batu iktsaziu zikaha. Ahaharadi humo kino niwatihi hazizo hazizo byritaha iwatsahi kytsa ahabo batu iktsaziu zikaha. Ahanahatsa humo ouro bara tu ahatsyhyrytariktsa ipokzitsi baratu. <sup>4</sup>Mysuk mysykbaik batu zikokzo. Mynahatsa hana bo ja, mytsyhyrytariktsa mohokdanaha. Ahamoksapyrêtsa Deus okzeka batu ipokzitsi. Ahahyrizikararawy hiba Deus humo tsipokzitsarêta. Ahazikarabyrihu ja kytsa tysitsumuêh̄i ana humo hi Deus tsakurêta. Ba zikmyi ana humo kino Deus tsakurêta.

<sup>5</sup>Tubabatu taparakykyhy zikzurukunaha. Asizahi Deus humo sispirikporêza, asizahi Deus tisapyrêna ty ziperykynaha. Asiza kino tahapytsa harere bo yh̄ ziknakaranaha. Tahapytsa humo simypokzitsiarêza h̄y. Iwazahi Deus okzeka simysapyrêza niyziknaha.

<sup>6</sup>Asiza Sara waza. Atatsa tabarikta Abarão harere bo yh̄ ziknakara. Ikia kapehakatsa hyrity watsa nikara. Iwa atatsa tabarikta pe isopyk.



Iwaze ikiahaka Sara waza tsimoziknaha. Ahapunihikrēza ahapyby bihuja Sara waza tsimaha. Iwaze Sara hyrytsa waza tsimoziknaha.

<sup>7</sup>Kyze kytsa bo motsasoko. Ahaokeza batu sipaik maha ana humo hi mytsatzyiutaha. Iwatsahi tysipokzitsinahaktsa! Deus tabo pahaoktyhyryk iwa ahaokeza kino niwatihi tabo mysioktyhyryk. Asizahi iharere bo yhy maha zeka ikiahatsa watsa iwatsahi harapetok tu tabo pahaoktyhyryk. Atatsa ka tsipokzitsikinahaktsa! Iwatsa tsimyzurunaha zeka Deus bo tsimypamykysokonahaze pahawaby.

#### Ahamysapyrētsa tsimykarannahatsa.

<sup>8</sup>Kyze sizubarētsa bo kapehawy motsasoko. Astsa botu mytsaty tsimykarannahatsa! Tyharape pokzitsinahaktsa! Utsa tahatsumuēhīnaha. Asa zuba batu tyso — uta zuba wasani — kasopyk iwa batu tyso. Tyharape pokzitsikinahaktsa!

<sup>9</sup>Deus zahawatawyhikze ahape niy. — Amy ty tisapyrēna ty ahabo nyny my — niy. Kytsa pahamyijakanaha zeka ikiahatsa sibo ba ziksimyija. Kytsa ahabo tahasakaninaha zeka awatu taha. Ikiahatsa hi tysipokzitsinaha. <sup>10</sup>Mytsatzyiutaha! Deus harere humo papeu ziwatahaka:

— Atahi tawahi tsakurēta mozihihik  
atahi batu mybarapetu mykara. Ba zikbetsak.

<sup>11</sup>Mysopyksapybyritsa tsmoewynaha  
katsaktsa tsipisapybakanaha!

Mypehatsitsa batu imysapy mynakaranaha  
katsaktsa tsipiharereziukunaha.

<sup>12</sup>Mypehakatsa kytsa sisopyksapyrētsa bo nasisuparaka iwaze sihumo  
mysipokzitsiki.

Ibo mopamykysokonahaze mysiwabyziuku.

Kytsa sisopyksapybyitsa mykaranaha  
sihumo takyriki — niy.

Iwa Deus harere papeu humo ziwatahaka.

#### Kiristu tuktsa ihumo sinini mykaranaha.

<sup>13</sup>Iwaze tsipisapybakanaha zeka aty sa pahakniki <sup>14</sup>Iwatuze wasani tsimykarannahaze siharereziubyitsa pahasapybyikinaha. Iwaze ahakurētsa tsimoziknaha! Sipybyrētsa tu nikaranaha ikiahatsa ahapunihikrētsa tsimoziknaha! Iwaze Deus tisapyrēna ty ahabo nyny my.

<sup>15</sup>Kiristu ahapehakatsa bo ka iktsazuba tahaktsa! Iharere bo zuba ma tsimynakaranaha. Aty my zeka tahi:

— Hawa Sesus humo aspirikpo — my. Sesus humo ahaspirikporētsa babatsa tsimaha zeka iwaze ahasikpybybyitsa Sesus soho sibo tsimytsasoziukunaha. <sup>16</sup>Sibo tsimytsasoziukunahaze sihumo

ahamypokzitsirētsa, ahaharereziuwytisa ty iwatsahi piwabytoktokonaha. Ahamysapyrētsa zeka siharerewabymybaranikitsa ty ka ba ziksisonaha. Ahasopyksapyrētsa humo ahaharere soho ziubyibatabyihuktsa mykaranaha!

— Kiristu hyrytsa batu simysapy maha — ana kino motsaso tsihikiknaha. Wasani tsimykaranaha iwatsahi batu siharerewabymybara pimiyikiknaha.

<sup>17</sup>Kytsa pahasapybyinaha zeka ahamysapyrētsa humo wasani. Kytsa pahasapybyikinaha Deus hi pahapokzi tsihikik. Ikiahatsa kytsa pahamyijakanaha zeka ahamysapybyitsa tsimykaranaha humo batu wasani. Ana humo hi Deus takyriki.

<sup>18</sup>Kiristu soho bo mytsatzyiutaha! Hawa nihyrikosokda mytsatzyiu tsimaha. Mypokzitsikitsa mysapyzeken nihyrikosokda. Estuba zuba nihyrikosokda iwaze Deus mysopyksapybyitsa tsikykaranaha Kiristu humo mymyokzohik. Kiristu imysapyrēnikita tuze siharereziubyitsa sapyzeken nihyrikosokda. Iwaze Deus bo mymyoktyhyryk. Mybarawy boze isukyrytsitsa inury zibezanaha. Deus zihyryzikpowy.

<sup>19</sup>Kiristu sinini ykarawy bo inakozore. Anaeze Deus harere nitsasoko. Sinini ziknakaranahatsa hurukwy eze hi Deus harere nitsasoko. <sup>20</sup>Asahi Deus harere bo batu h̄y zikaha. Tubabatu Noe tsaraha puētsikbyita nizuknikize Deus harere bo batu h̄y zikaha. Deus mybarawy eze ktsa humo iakyri tsihikbyita nikara. Tsakubyrisorokrēta nikara iharere bo yh̄y maha ziperyky. Sizubabyitsa tu iharere bo hȳy nikaranaha. Oito zuba iharere bo ma nikaranaha. Oito zuba tsaraha puētsikbyita bo nipupunaha. Deus oito zuba nasizuk. Asahi zuba tsaraha puētsikbyita eze tu niapykyryknaha. Ustsaktsa pihik bo tahababaiknaha.

<sup>21</sup>Pihik kino myharasusuwy soho piwatawyky. Myharasusunahaze ba zikmypyknaha. Katsaktsa tsimyharasusunahaze myzubaratsa pe:

— Abaka Deus okzeka wasani tsimaha. Iharere bo zuba hȳy tsimykaranaha. Sesus nihyrikosokda na humo mysapyrētsa tsimoziknaha — tsimaha. Anahi pihik eze myharasusuhiknahaze myzubaha bo tsiwatawynaha. Sesus Kiristu nihyryzikpozo anahumo hi iwatsa tsimykaranaha.

<sup>22</sup>Ata hi bjoikpe bo nido. Deus tuk napykyryk. Ipanuryk taba mynapykyryk. Sizubarētsa iharere bo hȳy mynakaranaha. Bjoikpe iknyktsa Deus tsumuēh̄itsitsa, simyharerewabyrētsa zikwytsitsa bjoikpe pehatsitsa iwatsa Sesus Kiristu harere bo ma mynakaranaha.

**Hawa Kiristu zikzuruku ikiahatsa iwatsa tsimyzurukunaha.**

**4** <sup>1</sup>Kiristu mybarawy eze tuze sinini nikara. Ana bo kino mytsatzyiutaha! Mypokzitsiwy tuk sinini nikara iwatsahi ikiahatsa hi astsatu mytsaty tahaktsa. Ikiahatsa kino niwatihi aba sinini tsimaha tu

tsikahazozikymybanaha. Sinini tsimaha zeka imysapybara humo batu hỹ zikaha iwatsahi batu ahamyi wasani tsimykaranaha.

<sup>2</sup>Tapara ahaharere bo zuba yhỹ ziknakaranaha abaka batu, Deus harere bo zuba ma tsinakaranaha. <sup>3</sup>Tubabatu kytsa sispirikpobyitsa watsa zikzurukunaha. Imysapybara ty zuba ziknakaranaha. Ana hi niwazuba tsikaha! Tapara wytykyryk ziknasisapybyrikinaha. Utsa kytsa nasiwowokoronaha, jabyiza ziknasipyrykyknaha usts a kytsa ziknasipyrykyknaha, tsõsĩ zikzikukunaha humo batu kyik ziky, tsahamypyryjagrẽtsa, deusbyitsa bo zuba ziknapamykysonaha. Abaka asa kino botu nepykbanaha niwazuba.

<sup>4</sup>Abaka sispirikpobyitsa okzeka ikiahatsa Sesus humo meky watu tsimoziknaha. Ahamysapyrẽtsa iwatsahi pahasapybyrikinaha. Ikiahatsa imysapybara ba hỹ zikaha. Amy ty batu imysapy batu situk zikaha ana humo kino batu sihyrinymyry iwatsahi ahasoho humo siharerewabymybarẽtsa. Ahasoho humo mybarapetu mykaranaha. <sup>5</sup>Siharerewabymybarẽtsa tu ka Deus bo tytsasonaha. Hawa mybarawy eze zikzurukunaha Deus bo motsasonaha. Aty wasani ziknakara Deus tisapyrẽna ty ibo nyny my. Atakta imysapybyita tu ziknakara Deus sinini ykarawy bo myzipeha. Kiristu myziksizoze kytsa ihuak ty sibo nyny my. Iwaze kytsa simysopyksapybyitsa kino niwatihi sihuak ty sibo nyny my.

<sup>6</sup>Tubabatu myzotsa nihyrikosokdanaha, hawa mybarawy eze zikzurukunaha, Deus nisiny. Atahi sihuak ty sibo nyny niy. Katsa mywatsa sihuak ty Deus sibo nyny niy. Kiristu Deus harere sibo nitsasoko. Iwaze asaktsa sispitutsa kino niwatihi Deus tuk tahawahi mynapykyryknaha.

#### **Isapyrẽnikia sohotsitsa usts a bo tysitsumuẽhĩnaha.**

<sup>7</sup>Aibani tsizubarẽna nepyk. Ikiahatsa hi Deus bo tsimypamykysokonaha. Batu ahakubyrizikzumu. Ahape tu ahasopyk tsimykymynahaktsa iwaze Deus bo tsimynapamykysokonaha. <sup>8</sup>Tyharape pokzitsikinahaktsa! Ahamysapyrẽtsa tsimaha iwatsahi ahaturytsa sisopyksapybyitsa nikaranaha ana soho bo hi batu mytsaty zikaha. Iwa tsimyzurunaha zeka Deus okzeka wasani tsimaha.

<sup>9</sup>Ahatukytsa ahawahoro bo mozumukunahaze ikiahatsa ispe tsimaha: — Kawahoro bo paku paku tynaha tohi buruk tihi ahawanu tyhãitaha tsimaha. Iwa tsimysasonaha sisukmotsa bo tsimaha. Ahaharerehakyhyk byihuja.

<sup>10</sup>Deus tisapyrẽna ty mybo nyny my. Iwaze mywatu tsiaksekenaha. Iwatsahi usts a tahatsumuẽhĩnaha. <sup>11</sup>Usts a kytsa bo tsimypamykysokonahaze Deus harere sibo tsimysasokonaha. Usts a bo tsimysitsumuẽhĩnahaze Deus zikwy humo tsiyawawakynaha. Iwaze kytsa:

“Deus zuba imysapyrēnikita my. Ihyrytsa bo tisapyrēna ty nyny my. Ana bo kino iktsa tsimaha” — mykaranaha. Katsaktsa Sesus Kiristu bo tsimytsasokonaha:

— O ikia zuba wasani tsimykara. Ikia hi tsamysapyrēta aharere bo zuba tsiwabytoktokonaha — tsimaha. Iwa tsimytsasoikiknaha tawahi ituk tsimynapykyryknaha. Iwa hỹ my.

#### **Hawa Kiristu tuktsa wa sinini tsimykaranaha.**

<sup>12</sup>Katukytsa ahahumo kamypokzitsiarēta. Sinini tsimykaranaha zeka Kiristu humo ahaspirikporētsa iwatsahi ahapyby byihuja. Ikiahatsa Sesus pahadutu. Batu tyso:

— Amo skaraba sinini tsimykaranaha. Utsa kytsa sininiwy bo batu istykzo — tsimaha. Iwa batu tyso. Sinini tsimykaranaha zeka batu ahasukatsihik. <sup>13</sup>Kiristu ahaziky wata niyzik. Atahi sinini nikara atawatahi ikiahatsa kino tsimaha. Abaka sinini tsimykaranaha bykyze Kiristu imysapyrēnikita tu piwatawykyze ahakurētsa hỹ. Ikiahatsa ahamysapyrētsa iwata tsimoziknaha. Iwaze ahakurētsa hỹ.

<sup>14</sup>Ikiahatsa Kiristu hyrytsa tsimaha. Asaktsa Sesus humo sispirikpobyitsa ahasoho humo siharerewabymybarētsa. Zahasohozuibyibatakanahaze ahakurētsaktsa! Pahasohometukunaha zeka Deus hyrikoso ahatuk mynapykyryk. Ana bo kino mytsatyziu tsimahaktsa! Hawa Deus hyrikoso wasani mynakara iwatahi ahatuk mynapykyryk, utsa siharerewabymybaranikitsa anahi piwatawyky.

<sup>15</sup>Kytsa harape ty beze beze byitaha. Utsa namy ty ka ykse ykse byitaha. Ahatsyhyryboa byihuja! Utsa kytsa humo batu isty myija. Batu ahaharerewabymybara. Iwa tsimykaranaha zeka kytsa pahasapybyikinaha ana humo hi wasani my. <sup>16</sup>Sinini tsimykaranaha zeka Kiristu hyrytsa humo meky watu my. Ana humo kino batu ahasikpyby. Ikiahatsa hi:

— O Deus myzo sinini tsimykaranaha Kiristu hyrytsa humo iwaze mykurētsa — tsimaha. Kiristu humo kytsa pahamyijakanahaze iwa Deus bo tytsasonaha.

<sup>17</sup>Abaka Deus mybarawy ezektsa bo iktsa mynakara. Asaktsa ihyrytsa mysimijakanaha sibo iktsa mynakara. Amo simysapybyitsa mykaranaha ana humo hi sihuak ty sibo nyny my. Aibani sihuak ty sibo nyny my. Sinini ykarawy bo mysipeha. Iwaze asa hi wasaniha humo batu sispirikpo iwatsahi sinini ykarawy bo mysipeha. <sup>18</sup>Deus harere papeu humo ziwatahaka:

— Tsihokdaharēnaha zeka simysapyrētsa Deus bo mysioktyhyryk. Iwaze hawa ja asaktsa sisopyksapybyitsa nikaranaha ana humo hi tsihokdaharēna hỹ.

Asaktsa Deus harere bo yhỹ habyitsa mykaranaha Deus bo batu mysioktyhyryk,

asahi sinini ykarawy bo mysipehahik — niy.

<sup>19</sup>Iwaze katsaktsa Deus harere bo ma tsimahaze kytsa mymymyijakanaha ana hi Deus myzehikik iwatsahi ihumo myspirikporêtsa hỹ. Mybarawysuknitsa humo myspirikporêtsa. Iwaze tyzipokzitsikinahaktsa! Deus hi myhumo tsimypokzitsiukrêta babata mybarawysuknitsa myhumo tsimypokzitsiarêta hỹ.

### Deus tuktsa hozipyrykzatsa watsa maha.

**5** <sup>1</sup>Abaka myspirikpokonahatsa bo pahapehaka ikiahatsa humo Sesus tuktsa sipokzitsikitsa pahapehaka. Uta kino niwatihi ikiahatsa watsa Sesus tuktsa sipokzitsikitsa. Hawa Kiristu sinini nikara motsasoko. Utakta ibo iktsa iky. Kaokzetu nitsakikinaha. Deus sizubarêtsa bo Kiristu imysapyrênikita mysiwatawy. Iwaze utakta niwatihi iwata kamysapyrêta mozik. <sup>2</sup>Deus zahawatawy ihyrytsa myspirikpokotsa tsimoziknaha ana humo hi zahawatawyhik. Iwatsahi hawa hozipyrykzatsa perysitsa mynasipokzikinahatsitsa iwatsa ikiahatsa Deus hyrytsa tynasipokzitsikinahaktsa kytsa! Mykyzoziurêtsa iwatsahi tatsumuêhînahâ hỹ. Ahahyriziktsozkawyo humo ahakurêtsaktsa anahi Deus mozihihik. Batu ahape tu zikaha:

— Tyzeka ja kytsa okyrysaro ty kabo nyny maha — my. Iwa zeka batu mytsaty tsimaha. Ahape tu ahasopyk:

— Hawaze kytsa tahatsumuêhînahâ — tsimaha. Iwa ahape tu ahasopyk.

<sup>3</sup>Isty ykzo ykzo byitaha. Isty betsak betsak byitaha sihumo tysipokzitsikinaha. Wasani tsimykaranaha. Iwa tsimyzurukunaha zeka ahawatsa wasani mykaranaha niwatihi. Pahasopykziukunaha. Asa hi:

— Myspirikponahatsa simysapyrêtsa astsatu tsimyzurunahaktsa kytsa — maha. <sup>4</sup>Kiristu mysopykanikita my. Atahi mykzotsa hozipyrykzatsa perysitsa wata my. Kiristu myziksizoze ihuak ty ahabo nyny my. Hawa mybarawy ezektsa siharereziuwysitsa sitsohorik ty nyny niaha. Sitsorik ty ouro ty nyny nikaranaha. Bykyze ouro mohokda. Ikiahatsa hi Deus isapyrênikia ty ahabo nyny my zeka. Anahi tawahi tisapyrêna.


<sup>5</sup>O ahapykyhyzytyktsa! Pykyhytutaha hawa haty sitsaikbatsa mopamykysokonahaze siharere bo ma tynakaranaha. Ahazubarêtsa tahapetsumuêhînahâ!

— Uta zuba wasani mykara — iwa batu tyso. Tahaharerewabynahakta! Deus harere ziwataha:

— Asa sizokzianikitsa utakta sihumo ikykyriki awatutsa zuba mysitsihikik. Asa sisorokbyitsa mysitsumuêhîekik hỹ — niy. <sup>6</sup>Iwatsahi ikiahatsa myhyrizikwanikita ihumo tsahamozikrêtsa tsimoziknaha. Deus izikwyrênikita ba hawa tohi zikzukninaha. Ikiahatsa ihumo tsahamozikrêtsa tsimoziknahaze Deus ahahumo tsakurêta mozik.

<sup>7</sup>Paikpa mytsaty tsimykaranaha zeka Deus bo tsimypamykysonaha:

— O Deus myzo paikpa mytsaty ikykara. Ikia humo kaspirikporêta iwatahi ikia tsipiktsumuêhĩ — tsimaha. Iwa ibo tytsasonaha iwatahi ahahumo tsimypokzitsiukrêta mynakara.



(1 Peduru 5.8)

<sup>8</sup>Tsikymynahaktsa tsihasuparakanahaktsa! Ahasopyksapybyitsa tsimykaranaha tsimoewynaha. Parini irapaze kakaik myze. Tawata Satanas mypauktaba pyryrykba mykara. Sesus humo mspirikporêtsa ana kino mopyk tshikik. Ihumo pykyhytutaha! Sesus humo ahaspirikporêtsa iwatsahi Satanas harere bo ba hỹ zikaha.

<sup>9</sup>Tsikahapunihiknahaktsa. Satanas hyrikoso sapybara pehaktsa harere bo waby waby byitaha. Ikiatsa ipe tsimaha:

— Aharere batu mykparawy. Aharere bo batu hỹ — tsimykaranaha. Iwa ibo tsimytsasoikiknaha. Ahawatsa ustsá Sesus tuktsa sinini nikaranaha. Nanabyitaba ahatukytsa Sesus humo mymymyijakanaha ana kino ahahyrinymyrêtsa. <sup>10</sup>Sininispyk tsimykaranaha. Deus ahahumo tsimypokzitsiukrêta. Kiristu imysapyrênikita. Deus zahawatawyhik Kiristu wata tsimoziknaha. Kiristu tuk tsimyzurukunaha. Deus humo wasani tsimykaranaha Sesus humo tspirikpotohinahaktsa! Ana humo hi pahatsumuêhiekik. Deus zikwy humo tsahamyharerewabyrêtsa tsimoziknaha. Sesus tsipunihikrêta my iwaze ikiahatsa iwata tsimoziknaha. Atahi tawahi imysapyrênikita. Iwaze ikiahatsa iwata tsimoziknaha hỹ, Sesus zikwy humo ahamysapyrêtsa tsimoziknaha. <sup>11</sup>Izikwy tawahi napykyryk. Myzubahatsa pehaktsa mozik. Abazubata mozik myzubaha iharere bo zuba hỹ mynakaranaha. Batu aty tohi iharere bo batu ma zikaha. Iwa hỹ.

**Abaka pepykyryk, katukytsa humo myhyrizikbarêtsa.**

<sup>12</sup>Abaka kawataha mopykyk. Kapapeutsa ikiahatsa bo izubabratu. Siras Sesus harere bo hỹ mynakara atahi kapapeu ty ahabo nyny my. Ata kino myzipeha kapapeu ty ahabo nyny my. Uta pahakusukniwyky iwatahi papeu humo piwatahaka. Deus myhumo tsimypokzitsiukrêta iharere bo zuba hỹ mynakara. Iwatsahi ihumo tspirikpotohikinahaktsa!

<sup>13</sup>Kytsa kapauk bazektsa ahahumo sihyrizikbarêtsa. Asahi Sesus tuktsa niwatihi Babironija ezektsa maha. Asahi ikiahatsa watsa Deus nisiwatawyhik. Marakos niwatihi ahahumo tsihyrizikbarêta. Atahi katse wata. <sup>14</sup>Tyharape pokzitsikinahaktsa! Iwaze tyharapehapyryknahaktsa!

**Deus pahasapywyky.**

Utakta Deus bo mopamykysoikik ipe my:  
— O myzo ahahyrytsa batu paikpa mytsaty zikaha. Ikia hi  
tysiakusukniwykykta — my. Niwazuba.

Peduru